

6. Aðilinn verður að hafa ábyrgðartryggingu, nema skoðunin sé á ábyrgð ríkisins á grundvelli landslaga eða framkvæmd á vegum ríkisins.
7. Starfsmenn aðilans skulu bundnir þagnarskyldu hvað varðar allar upplýsingar sem þeim hlotnast við störf sín (nema gagnvart þar til bærum stjórnvöldum) í samræmi við reglugerð þessa eða þau ákvæði sem kunna að vera í landslögum um framkvæmd hennar.

20. janúar 1996

Nr. 78

REGLUR

um kaupskrárnefnd varnarsvæða.

1. gr.

Utanríkisráðherra skipar kaupskrárnefnd varnarsvæða til að ákveða ráðningarkjör og vinnuskilyrði starfsmanna varnarliðsins.

Nefndin skal skipuð þremur mönnum og þremur til vara til tveggja ára í senn. Utanríkisráðherra skipar formann og varaformann án tilnefningar og gefur Alþýðusambandi Íslands og Vinnuveitendasambandi Íslands kost á því að tilnefna hvoru um sig einn fulltrúa í nefndina og einn til vara.

2. gr.

Kaupskrárnefnd varnarsvæða skal hafa fasta starfsaðstöðu í Reykjanesbæ skv. nánari ákvörðun utanríkisráðherra. Fundarritari, tilnefndur af utanríkisráðherra, er nefndinni til aðstoðar og bókar alla fundi hennar.

3. gr.

Hlutverk kaupskrárnefndar varnarsvæða er að sjá til þess að Íslendingar, sem starfa hjá varnarliðinu eða erlendum verktökum þess á varnarsvæðum, fái kaup og kjör og njóti þess öryggis og aðbúnaðar á vinnustað sem íslensk lög, kjarasamningar og venjur segja til um á hverjum tíma. Þá skal nefndin sjá til þess að þeir njóti sambærilegra kjara og almennt gerist í sömu eða hliðstæðum störfum utan varnarsvæða.

4. gr.

Þegar um er að ræða starf, sem gildandi kjarasamningar taka ekki til, getur kaupskrárnefnd við ákvörðun launa og annarra starfskjara fyrir umrætt starf, valið viðmiðunarstarf eða viðmiðunarstörf sem að dómi nefndarinnar eru hliðstæð enda séu ákvæði um þau störf að finna í viðurkenndum kjarasamningum. Slík viðmiðun getur gilt að hluta eða öllu leyti eftir ákvörðun nefndarinnar.

5. gr.

Kaupskrárnefnd varnarsvæða skal í kjölfar almennra kjarasamninga meta áhrif þeirra á kjör hlutaðeigandi starfshópa á varnarsvæðum og fella úrskurð um hvernig framkvæma eigi breytingar. Úrskurðir um breytingar, sem einvörðungu byggjast á framkvæmd kjarasamninga utan varnarsvæða, skulu að jafnaði hafa sama gildistíma og hlutaðeigandi samningar. Telji nefndin ástæðu til breytinga umfram það sem leiðir beint af samningsbundinni launaþróun viðmiðunarhópa skulu slíkar ákvarðanir nefndarinnar að jafnaði gilda frá þeim tíma er úrskurður er upp kveðinn, nema rök standi til annars.

6. gr.

Kaupskrárnefnd varnarsvæða skal hafa samband og eftir atvikum samráð við þær stofnanir og nefndir sem starfa á vegum aðila vinnumarkaðarins eða hins opinbera að rannsóknum á kjaramálum.

7. gr.

Kaupskrárnefnd skal koma saman eins oft og þörf er á og ef einhver nefndarmanna óskar þess sérstaklega. Formaður nefndarinnar boðar til funda hennar. Nefndin skal hraða störfum sínum svo sem kostur er.

8. gr.

Fundir kaupskrárnefndar varnarsvæða skulu haldnir í Reykjanesbæ eða Reykjavík eftir því sem hentugast þykir hverju sinni. Einstakir nefndarmenn, fulltrúar þeirra eða ritari nefndarinnar fyrir hennar hönd skulu hafa reglulegan viðtalstíma í Reykjanesbæ þar sem aðilar að málum, sem fyrir nefndinni liggja, eða varnarliðið geta leitað upplýsinga og komið athugasemdum á framfæri.

9. gr.

Nefndin skal halda sérstaka gerðarbók og færa þar til bókar alla fundi nefndarinnar svo og öll þau erindi sem henni berast og afgreiðslu á þeim.

10. gr.

Kaupskrárnefnd skal tafarlaust taka til meðferðar allar fyrirspurnir, erindi og kærur sem henni berast um ráðningarkjör og vinnuskilyrði á varnarsvæðum frá hlutaðeigandi stéttarfélagi einstakra starfsmanna eða starfshópa á varnarsvæðum eða vinnuveitanda þeirra.

11. gr.

Tilkynna skal aðila að máli fyrirfram hvenær erindi hans verður tekið fyrir í nefndinni. Þegar fyrirsjáanlegt er að afgreiðsla máls muni tefjast skal nefndin skýra aðilum máls frá slíkri töf, ástæðum hennar og hvenær vænta megi niðurstöðu.

12. gr.

Nefndinni er heimilt, í samráði við utanríkisráðherra, að kveðja til sérfróða aðila nefndinni til aðstoðar, þegar nauðsyn þykir til við úrlausn umfangsmikilla og flókinna mála.

13. gr.

Kaupskrárnefnd varnarsvæða skal rannsaka vandlega og sem best hvert það mál sem nefndinni berst. Nefndin skal gæta þess að allar viðeigandi upplýsingar liggi fyrir um ráðningarkjör og vinnuskilyrði, einkum vinnulaun, launauppbætur og öryggisráðstafanir við vinnu, áður en ákvörðun er tekin eða úrskurðað um ágreiningsefni.

14. gr.

Viðkomandi verkalýðsfélag eða varnarliðið skulu eiga þess kost að skýra viðhorf sín til málsatvika, eftir atvikum bæði skriflega og munnlega, fyrir nefndinni, með vætti vitna og sérfræðinga, og tjá sig um öll gögn er úrskurður kann að verða byggður á áður en hann er kveðinn upp.

Nefndin getur vísað frá erindum ef áður hefur verið fjallað um kæruefni og ekki liggja fyrir ný gögn eða röksemdir sem taka þarf afstöðu til.

15. gr.

Nefndin skal eins fljótt og kostur er svara skriflega fyrirspurnum og kærum sem henni berast. Í úrskurðum nefndarinnar skulu koma fram málavextir og forsendur. Niðurstaða úrskurðar skal rökstudd.

16. gr.

Til afgreiðslu einstakra mála í kaupskrárnefnd varnarsvæða þarf samþykki allra nefndarmanna. Samhljóða úrskurðir nefndarinnar eru endanlegir, sbr. þó 2. mgr. 17. gr. reglna þessara.

17. gr.

Komist kaupskrárnefnd varnarsvæða ekki að samhljóða niðurstöðu um lyktir einstakra mála skal formaður nefndarinnar og varamaður hans víkja sæti úr nefndinni. Við þær aðstæður og til úrlausnar í einstökum málum sem þannig er ástatt um skal í stað formanns taka sæti í nefndinni, sem formaður hennar, sérfróður og óvilhallur einstaklingur, tilnefndur af héraðsdómi Reykjaness, til tveggja ára í senn. Sami aðili skal tilnefna varaformann formanns sem þannig er skipaður. Meirihluti atkvæða ræður úrslitum við afgreiðslu einstakra mála í kaupskrárnefnd varnarsvæða þannig skipaðri.

Til kaupskrárnefndar varnarsvæða, skipaðri skv. 1. mgr. þessarar greinar, má í sérstökum, óvenjulegum og fordæmislausum tilvikum, þrátt fyrir ákvæði 16. gr., einnig skjóta úrskurðum og ákvörðunum kaupskrárnefndar varnarsvæða, þó að samhljóða séu, ef þær fela í sér nýja stefnumörkun og grundvallarbreytingu við ákvörðun launa eða annarra kjara og hafa veruleg og ófyrirséð útgjöld í för með sér. Kaupskrárnefnd varnarsvæða, skipuð nefndarmönnum í ágreiningsmálum skv. 1. mgr. þessarar greinar, metur hverju sinni hvort uppfyllt eru skilyrði til málsskots.

18. gr.

Kaupskrárnefnd varnarsvæða skal tafarlaust senda allar afgreiðslur sínar, tilkynningar og úrskurði um ráðningarkjör og vinnuskilyrði íslenskra starfsmanna varnarliðsins til varnarmálaskrifstofu utanríkisráðuneytisins sem sér um að upplýsa aðila um niðurstöður og úrskurði nefndarinnar.

Nefndin skal jafnframt kom á framfæri við varnarmálaskrifstofu utanríkisráðuneytisins upplýsingum um alla helstu kjarasamninga og allar breytingar sem kunna að verða gerðar á launum og öðrum kjörum launþega hér á landi og áhrif geta haft á kjör íslenskra starfsmanna varnarliðsins. Varnarmálaskrifstofa utanríkisráðuneytisins hefur milligöngu um að koma slíkum upplýsingum á framfæri við varnarliðið með formlegum hætti svo og varnarmálanefnd.

19. gr.

Kaupskrárnefnd varnarsvæða skal í lok hvers árs senda utanríkisráðherra skýrslu um störf sín.

20. gr.

Um hæfi nefndarmanna og málsmeðferð fyrir nefndinni að öðru leyti en í reglum þessum greinir fer skv. ákvæðum stjórnsýslulaga, nr. 37/1993.

21. gr.

Reglur þessar eru settar samkvæmt 4. tölul. 6. gr. viðbætis við varnarsamning milli Íslands og Bandaríkjanna frá 5. maí 1991, lögum nr. 110/1991, um lagagildi varnarsamningsins milli Íslands og Bandaríkjanna og um réttarstöðu liðs Bandaríkjanna og eignir þess, svo og lögum nr. 106/1954, um yfirstjórn mála á varnarsvæðum o.fl.

Reglur þessar öðlast þegar gildi. Um leið falla úr gildi reglur nr. 708 frá 30. desember 1994 um kaupskrárnefnd varnarsvæða.

Utanríkisráðuneytinu, 20. janúar 1996.

Halldór Ásgrímsson.

Grétar Már Sigurðsson.